

鎮海縣志

廿三～廿五

新修鎮海縣志

知縣事四川周雲章題

卷緒五季開離
板印魚池書院

鎮海縣志卷二十三

人物傳四

國朝一

周謙字吉人少精儒業順治元年隨孔有德征粵授南海教授尋陞江西峽江知縣地瘠田蕪士民素苦征斂謙履畝繪圖請諸巡撫多所豁免閭閻咸感其惠後罷職客遊淮楚閒晚年好爲詩古文尤工畫蘭邑人至今寶之

唐志
彙

梅南遠字味元父爲縣掾有遣戍者值妻婉爲謀展行期一獄株連三十餘人方冬月俱老弱不堪道路告之邑令得免省解人皆稱其陰德南遠幼負軼才長補諸生屢應省試不售明魯王時嘗召爲監紀知事必無成辭不受旣

而浙東盡降鎮將王茂才雅識南遠薦於征粵之固山佟某旣入嶺南南遠謂固山曰五羊月城瀕海數十步令掘爲河渠戰艦得傍城進則步履可登何必環攻而後勝也固山然之竟下廣州以功授瓊州知府時瓊尙負隅大帥將克而屠之南遠策一騎先馳入招撫闔郡恃以無恐民勒碑紀其德有南海全仗一枝梅之語民病疫禱於城隍神七晝夜幾忘寢食疫癘竟息復以諸邑私派浮於正供請於上官嚴革其弊明年有反側者檄至南遠力不能拒乃納印於兵使者避之佛山鎮已而事平在位者多得罪獨南遠以潔身先去制府疏復原官命方下而南遠疾卒

時順治九年也

天愚集

李如珪字玉叔唐之長子例襲世職以補諸生讓於弟如璋弟分祿之半以餉如珪曰服官者食祿吾書生何敢虛糜朝廷糈辭不受順治四年以貢授廣甯知縣時粵東初下如珪抵任撫綏瘡痍朝夕拮据巡撫蕭啟元手書清表百城褒之旋以盡瘁卒子懋勳字敬升年十二遊庠後以恩貢隨父之官父死上官檄懋勳署廣州教授旣而辭職歸服闋知交城縣交田河淤水淺而賦特重懋勳請於御史減之俗業氈罽以生上官取之無藝又請御史節以額交地當孔道車轄往來甚繁懋勳費悉已出絕不索諸里

甲政聲大起歿於任

天愚集參
乾隆志

任德敏字捷之文華孫性孝母丁氏治家嚴時有所不悅

輒長跪請責少好莊列及唐宋八家文下筆滔滔數千言
爲人瀟灑喜宏獎風雅不屑苟同流俗順治八年以恩貢
授通判改潯州經歷適當兵燹之餘奉檄綏輯遺黎循聲
憇著有宦死於潯者妻子甚貧分俸贍之又爲請於上官
給道里費始得歸與修府志考訂精覈德敏先嘗問二程
子讀書處人無知者至是搜求古蹟知在郡城外數十里
蘿叢巖乃披荆棘親自訪之作記以示潯人署宜山縣案
隆志繫署宜山於官兵馬司下誤攷謝景昌撰任捷之傳
係卒於兵馬司任則攝篆宜山當在前爲潯州經歷時
首定苗亂上撫苗條議案謝傳作撫蠻議上之監司邑多
在爲經歷時與乾隆志互異虎災設法除之復葺學宮進諸生之秀者課以文字暇輒
坐對簡編晨夕不釋手或以吟詠自娛時稱爲文學吏丁

外艱回里服闋以原官補思州地更荒僻德敏盡心守職
如在潯時康熙十一年陞南城兵馬司副指揮長至有事
郊壇蚤起除道感寒疾卒德敏性嗜金石當歸自潯州友
人疑其多得廣南明珠犀象及發槩裝視之有石刻四一

爲夫子燕居像

案許應禎粵裝詩序像出唐吳道子手至宋嘉定時鐫之潯州署中與曲阜所刻先

師像相似但背多一劍髯固無異也

一爲磨崖碑

案詩序磨崖在道州捷之歸途中購之字大徑尺點

畫分

一爲柳碑一爲元祐黨人碑

案詩序黨人碑在桂林龍隱洞漣漫已半皆

相與大笑同里許應禎有粵裝詩紀之

唐志豪參詩文草創文獻草創

張翼字燕及少孤育於母俞氏長爲諸生有聲登順治九

年進士知肥鄉縣士囂民悍翼爲均里徭嚴保甲勵士習

由是民鮮爲盜而士知尙學其婦女或相詬詆輒投崖自

繙翼嚴禁凡夫視其婦死不救者坐風寢息邑濱漳河易
於衝決積歲病民翼築隄以捍露宿水次默禱於神感大
風壅沙之異決口不隄築而塞民德之立碑紀焉入爲刑
部主事晉郎中持法務平多所矜釋丁內艱歸卒

曹府志

屠粹忠字純甫順治十五年進士知封邱縣時邑遭河患
城垣廬舍傾頽殆盡前令日艤舟以聽事粹忠至築土誅
茅粗立官署左右置草舍數十間招集流亡居之巡行城
址出磚甃土中充雉堞之用鳩工修築不兩月城垣如故
一日水暴漲堤崩粹忠率眾往見水勢洶湧不可遏坐隄
上慟哭願以身當洪流爲萬民乞命是夜水卽退時布政
使徐化民有事大名取道封邑忽見水平歎曰河伯且爲

爾効靈況我輩乎歲大旱禾黍盡焦民思逃散粹忠齋戒
禱赤日中不少息夜夢城隍神告曰寅日雨已日晴何如
粹忠寤卽出示安民告以神語至期果一雨三日士民歡
慶是年穀倍登人皆謂精誠所致云在任十載政聲報最
康熙十年陞禮科給事中首疏請復歲試士氣之振實重
賴焉江南巡撫議題州縣外補粹忠疏言爵賞宜從中出
與時不合乞終養歸久之服闋補兵科陞工科都給事中
三十六年淮揚大水上海民十要疏語皆切中陞大理寺
丞旋授奉天府丞晉大理少卿四十一年擢兵部右侍郎
明年陞本部尙書先是

聖祖仁皇帝以粹忠老年矍鑠書修齡堂匾額賜之旣又

賜臨趙孟頫行書曰白鹿城頭百萬兵碧油幢下一書生
如今始識爲儒貴臥聽元戎報五更乃知爲大司馬之豫
兆也卒官

曹府志

案曰屠粹忠陳錫嘏盧宜張翼皆鄞產而舊志選
舉均載其姓氏以諸人實占籍定海也故爲補入
列傳

方啟焜字蜚英康熙二年歲貢司訓湯溪十四年廷議大
學裁訓導中小學裁教諭啟焜上言士窮年力學予以一
命榮亦所以培士氣也裁非便并言歲貢必親赴廷試貧
士往反維艱士林壯之其在教席崇經術恤孤寒諸生感
其德祀於湯溪名宦祠

乾隆志

案曰廷議裁學官方啟焜官僅司訓分難上言或
上書於大吏耳抑

國初尙沿明制教官亦得言事耶

薛士學初名士玪字五玉三才從子幼而敏慧其叔母李
守節而教育之年十七補諸生喜讀書目短視俯首就案
晝夜無閒至燈火蒸帽而不知久之博通羣籍丹黃甲乙
罔不精確爲文原本六經而取裁於史質實典茂自成一
家賦性高簡榮利聲譽不以介胸偶閭黨讌集坐有談朝
市事者必正色拒之年未艾棄去場屋旋貢太學亦不赴
好茗飲飲或連數甌嘗曰吾生平無他可傳可傳者獨此
耳晚益有志理學每得宋元儒先之書輒盥櫛手鈔之日

與其徒講道論義孳孳不已邑令唐鴻舉慕其賢屏騶從
造門謝不見亟請則曰某布衣誼不當私謁令尹必欲見
朔旦學宮可矣及期行相見禮外無一語及他事時論高
之卒年八十餘學者稱爲書巖先生兄士琬字孟玉諸生
明崇禎時內監某奉詔有事浙東至縣文士見者各有贈
遺學官邀士琬往獨辭之不去

書巖集參
蛟川備志

王又曾字亦沂其先世良明建文時爲浙江按察使聞燕
兵入都合署自焚成祖戍其子於昌國後徙家定海又曾
早失怙恃大母撫養之年十七補諸生研究經史抉摘奧
窔多先儒所未發與同里薛士學齊名時浙河以東文社
方盛聞其才爭相招致又曾辭曰結納以博名譽華士所

爲吾不願也叛將張國柱縱兵肆掠又曾負大母攜幼弟奔避深山及歸室被毀授徒以供菽水嘗有里役之累破產救之大母歿廬墓六載鄉黨稱其孝尋爲鵝湖書院山長慨然慕紫陽象山之爲人與諸生談論道義亹亹不倦學使鄭開極額其居曰亦文中子未幾歸而講學於家從遊日眾邑令黃宮柱延爲鄉賓丰儀俊偉矩度雍容聚觀者咸嘖嘖歎息卒年七十餘又曾學問皆從實踐中來爲人深自韜晦初與陳錫嘏最契互以經義相質及錫嘏官翰林又曾不復修一札焉學者稱爲魯閭先生子疇性孝父卒卽不入室設榻母傍十三載母八十二將卒曰吾素憂汝弱不意今餘年賴汝活也疇以體弱善攝生至七十

卒值暑月衣單易簪時猶整袂不使見體云

陳錫嘏撰傳
參乾隆志

郎汝望字枚簡一字雙梧諸生博覽典籍工吟詠與謝兆
昌謝緒章沈從約諸人相倡和文亦務崇先正督學顏光
敏彭始搏校士甯波皆有國士之目邑令唐鴻舉延主講
席門弟子多先後掇取巍科晚年尤精韻學子作霖字起
巖一字寶山天姿穎異讀書數行竝下爲文不移晷而輒
就中康熙四十八年進士知濟陽縣濬河築隄多行惠政
濟人祀之名宦

乾隆志參蛟川
詩話濟陽縣志

陳鴻達字士楷號式之幼穎敏過目輒成誦長擅經濟才
總兵常進功延致幕下相得甚歡後歷兩粵三輔閒諸貴
人稔其幹略欲題以牧宰之任固辭不受人服其高

唐志
棠

樊昂字子威指揮懋之後諸生爲人冲和爾雅與陳昌統爲友聞見最廣同里張懋延編明季遺老傳就昂訂正焉閒喜爲詩有風人之致晚以耆齒碩德爲鄉里所重

蛟川詩話

胡嗣佐諸生守蠱上之節食貧守約與兄弟甚友愛工於詩有聊以吟同里范兆芝周西嘗見而評定焉門人王鶴

遷字東臯亦能詩有集

蛟川詩話

同時鄭宗翰字翼宸沈潛力

學品行孝友鄉評重之值明季遂不事舉業專心著述卒

年八十三

楊琳撰墓志

虞二球字天玉別字龍滄父一稷見孝義傳二球幼秉殊

質博覽能文爲諸生二十載居貧守約絕不干預外事順

治十五年成進士康熙三年選授安化知縣與慶陽知府

傳宏烈相得甚歡適縣之南鄉有悍民以逋賦擊死吏胥知府聞之欲往勦二球言此殆前令催科失次第積玩致然令今親往繫之足矣何勦也卽策馬至其地民數百家已驚惶將他徙二球慰之曰爾曹何罪吾治殺隸者眾見從者僅數人又不持兵械遂安居無恐而悍民二人卒伏法知府歎息以爲賢秩未滿以治行高等徵爲兵部主事晉員外郎八年典試山東得顏光猷丁暉等皆知名士十年陞戶部四川司郎中十二年出爲江南按察使僉事提督學政勤於閱卷搜取博洽之儒如崇明顧藻青蒲陸祖脩王師旦王喆生華亭陳嘉璧無錫周宜振俱爲二球所識拔有鎮江李虎文者以高才久應童子試尤爲扼抑二